



Minggu, 05 September 2021
Ogen: Esekiel 14:1-11



Jeralah Janah Tadingken Berhalandu!



Moria si ikelengi Tuhan, pernah nge bayangkenndu kam kundul dua-dua ras Tuhan? Ercakap-cakap, nuri-nuri Tuhan man bandu kerna isi pusuhNa?

Paksa enda Tuhan sangana nuri-nuri man Esekiel, kerna isi pusuhNa, uga ateNa ngenana kalak Israel tapi Israel ngobah padan. Lawes kalak Israel e ndahi dibata-dibata si deban. Ibahanna berhala-berhala jadi penggurunna. Ipediatna pusuhna ikuasai berhala-berhala si mabai ia kempak dosa. Ngean ate bangsa e kempak berhala asangkan man Tuhan. Penungkunenna pe enggo nabi-nabi perguak, lanai Tuhan. Banci nge si bayangken uga getemna ras cedana pusuh Tuhan e natap si jadi atena nilah man kalak si deban? Bagem penuri-nuriNa man Esekiel kerna pusuhNa si ceda.

Mesera kal ngelupaken si ateta ngena. Bagem pusuh Tuhan e, amin pe getem ras ceda, la terlupkenSa Israel e, lalap daramina dalan uga maka Israel e mulih man baNa. IpesikapNa pusuhNa ngalo-ngalosa amin pe enggo piga-piga kali Israel e nulak IA. Emaka isuruhNa Esekiel ngerana man bangsaNa nina, Dage gundari turikenlah man kalak Israel kai katanKu, Aku Tuhan si Erdolat. Jeralah janah tadingken berhalandu si ciga ateKu e. Isi pusuh Tuhan e lalap siat man kalak si jera ras nadingken berhala-berhala si mabai ia erdosa. Moria si ikelengi Tuhan, kai kin ndia si jadi berhala man banta i bas paksa enda? Si megati erbahansa kita ndauh ras Tuhan e. Berhala e banci kesibukenta, lalap lit dahin, lima seh enem erbage dahin e si man dahinken teptep wari, seh maka lanai sempat kita ercakap dua-dua ras Tuhan. Pusuhta enggo lalan ikuasai dahin ras kesibukenta. Menam lanai lit ingan Dibata bas pusuh e. Lalah pusuh e pe enggo menam nilah i bas Dibata nari? Bagi jadina ate Tuhan man Israel, bagem jadiNa atena kempak kita. Tetap kita timaiNa reh ndahi IA tiap wari. Tedeh ateNa kita kundul dua-dua ras IA.